



**Sud Bosne i Hercegovine**  
**Суд Босне и Херцеговине**

---

**S1 3 IŽ 040867 21 IŽ**  
**Sarajevo, 16.07.2021.godine**

Sud Bosne i Hercegovine u Sarajevu, u apelacionom vijeću sastavljenom od sudija Vesne Trifunović, kao predsjednika vijeća, Dinke Beslagić-Čovrk i Srete Crnjaka, kao članova vijeća, odlučujući o žalbi Nebojše Vidakovića iz Šekovića, Vrela bb, izjavljenoj protiv rješenja Centralne izborne komisije Bosne i Hercegovine, broj: 06-1-07-1-346/21 od 01.07.2021.godine, o davanju saglasnosti za imenovanje članova Opštinske izborne komisije Šekovići, u nejavnoj sjednici, održanoj dana 16.07.2021. godine, donio je

**R J E Š E N J E**

**Žalba se odbija kao neosnovana.**

**O b r a z l o ž e n j e**

Rješenjem Centralne izborne komisije Bosne i Hercegovine, broj i datum navedeni u uvodu, data je saglasnost na rješenje Skupštine opštine Šekovići broj: 01-022-133/21 i 01-022-134/21 od 27.05.2021.godine, kojim se na dužnost u članstvu Opštinske izborne komisije Šekovići imenuju 1. Miloš Jevtić, predsjednik i član, 2. Vladanka Bojanić, članica.

Žalitelj je blagovremeno uložio žalbu na navedeno rješenje zbog nepotpuno i nepravilno utvrđenog činjeničnog stanja i pogrešne primjene materijalnog prava.

U žalbi navodi da iz obrazloženja rješenja koje je donijela Centralna izborna komisija ne može se vidjeti koju je dokumentaciju razmatrala niti na osnovu kojih činjenica je utvrdila da su ispunjeni uslovi propisani Izbornim zakonom i Uputstvom o utvrđivanju kvalifikacija, broja imenovanja i razrješenju u obuci članova izborne komisije osnovne izborne jedinice u Bosni i Hercegovini. CIK je propustila da utvrdi da nije ispoštovana procedura iz člana 7. Uputstva, odnosno da Skupština opštine Šekovići konkurs nije raspisala u skladu sa Uputstvom jer je konkurs raspisan za predsjednika i jednog člana Opštinske izborne komisije, ali se uslovi koji su navedeni u konkursu odnose na članove Opštinske izborne komisije. Osim toga, komisija nije utvrdila pitanja za pismeni dio intervjuja, dok za usmeni dio nisu utvrđena pitanja.

Konačno predlaže da apelaciono odjeljenje Suda BiH poništi pobijano rješenje Centralne izborne komisije Bosne i Hercegovine.

U odgovoru na žalbu Centralna izborna komisija Bosne i Hercegovine je predložila da se žalba odbije kao neosnovana.

Ispitujući ožalbenu odluku u okviru žalbenih navoda, vijeće Apelacionog odjeljenja Suda BiH je odlučilo kao u izreci iz sljedećih razloga:

Žalba nije osnovana.

Uvidom u spis i dostavljenu dokumentaciju i evidencije, prema shvatanju apelacionog vijeća, CIK BiH je pravilno utvrdila da imenovanina dužnost u članstvu Opštinske izborne komisije Šekovići i to Miloš Jevtić, predsjednik i član i Vladanka Bojanić, članica, ispunjavaju uslove propisane odredbama Izbornog zakona Bosne i Hercegovine i Uputstvom o utvrđivanju kvalifikacija, broja, imenovanju i razrješenju i obuci članova izborne komisije osnovne izborne jedinice u Bosni i Hercegovini ("Službeni glasnik BiH", br. 29/18 i 36/19).

Odredbom člana 2.12. stav (5) Izbornog zakona Bosne i Hercegovine („Sl. glasnik BiH“, broj: 23/01, 7/02, 9/02, 20/02, 4/04, 25/05, 65/05, 77/05, 11/06, 24/06, 32/07, 37/08, 32/10, 18/13, 7/14 i 31/16) je propisano da članove općinskih i gradskih izbornih komisije imenuje općinsko vijeće, odnosno skupština općine, uz saglasnost Centralne izborne komisije Bosne i Hercegovine, na osnovu javnog oglasa po proceduri koju utvrđuje Centralna izborna komisija Bosne i Hercegovine.

Istom odredbom je utvrđeno diskreciono pravo općinskih vijeća, odnosno skupština općine, kao najvišeg organa lokalne samouprave, da imenuje članove općinske/gradske izborne komisije. Centralna izborna komisija Bosne i Hercegovine, kako je propisano navedenom odredbom, **daje saglasnost na akt o imenovanju.** Skupština opštine Šekovići je aktom broj: 01-222-146/21 od 10.06.2021.godine, zatražila od Centralne izborne komisije Bosne i Hercegovine saglasnost na Rješenja broj: 01-222-133/21 i 01-002-134/21 od 27.05.2021. godine, kojim se **Miloš Jevtić imenuje na dužnost predsjednika i člana, te Vladanka Bojanić imenuje na dužnost člana Opštinske izborne komisije Šekovići.**

U konkretnom slučaju, Centralna izborna komisija Bosne i Hercegovine je, u okviru svojih nadležnosti propisanih Izbornim zakonom Bosne i Hercegovine, utvrdila da je ispoštovana procedura za imenovanje na dužnost u članstvu Opštinske izborne komisije Šekovići propisana u članu 7. Uputstva o utvrđivanju kvalifikacija, broja, imenovanju i razrješenju i obuci članova izborne komisije osnovne izborne jedinice u Bosni i Hercegovini (u daljem tekstu: Uputstvo) ("Službeni glasnik BiH", broj: 29/18). i da je u skladu sa Uputstvom o dopuni i izmjeni Uputstva o utvrđivanju kvalifikacija, broja, imenovanju i razrješenju i obuci članova izborne komisije osnovne izborne jedinice u Bosni i Hercegovini/"Službeni glasnik BiH", broj:36/19).

Odredbom člana 10. stav (2) Uputstva je propisano da Centralna izborna komisija Bosne i Hercegovine daje pisanu saglasnost na odluku o imenovanju članova izborne komisije, ukoliko su ispoštovane procedure iz člana 7. ovog uputstva i ukoliko izabrani kandidati ispunjavaju propisane uslove, i tu saglasnost dostavlja nadležnom organu. Stoga je Centralna izborna komisija Bosne i Hercegovine utvrdila da je rješenje Skupštine Opštine Šekovići o imenovanju predsjednika i člana Opštinske izborne komisije Šekovići zakonito, obzirom da imenovani ispunjavaju sve imperativne uslove propisane Izbornim zakonom Bosne i Hercegovine i

Uputstvom.

Naime, uvidom u spis dostavljen od strane Skupštine opštine Šekovići pravilno je utvrđeno da je Skupština opštine Šekovići donijela odluku 23.04.2021. godine kojom je razriješila dužnosti komisiju za provođenje konkursne procedure za imenovanje predsjednika i jednog člana Opštinske izborne komisije u sastavu Marinko Vlačić, Vlado Vidaković i Cvijetin Pavlović, te novom Odlukom imenovala novu komisiju u sastavu Zoran Divović, Marinko Vlačić i Slaviša Sokić. Raspisan je javni konkurs za imenovanje predsjednika i jednog člana Opštinske izborne komisije Šekovići nakon razrešenja dotadašnjeg predsjednika Nebojše Vidakovića i člana Opštinske izborne komisije Vladana Kostića, zbog isteka mandata.

Osim toga, obavljen je dana 18.05.2021. godine pismeni i usmeni dio intervjua utvrđen Poslovníkom o provođenju konkurencije i imenovanju predsjednika i jednog člana Opštinske izborne komisije Šekovići. Komisija za provođenje konkursne procedure 13.05.2021. godine utvrdila je i listu pitanja za provođenje pismenog i usmenog dijela u intervjua za ocjenjivanje uspješnosti kandidata. Ocjenjivanje i bodovanje kandidata koji su pristupili pismenom i usmenom dijelu testiranja izvršeno je nakon sastavljanja rang liste kandidata prema osvojenom broju bodova. Tako je Miloš Jevtić prvorangirani kandidat sa osvojenih 30 bodova, a Vladanka Bojanić, drugorangirana sa osvojenih 27 bodova, Nebojša Vidaković sa osvojenih 24 boda trećerangirani, Milenko Matić na četvrtom mjestu sa 17 bodova. Konačna odluka donesena je u skladu sa položajem kandidata na rang listi, što opravdava pravilnost i zakonitost pobijane odluke.

Centralna izborna komisija Bosne i Hercegovine, kao organ koji daje saglasnost na pisani akt o imenovanju člana izborne komisije osnovne izborne jedinice u BiH uvijek je obavezna dati takvu saglasnost, ako u postupku utvrdi da su ispunjeni svi propisani uslovi i da su ispoštovane propisane procedure. Nedavanjem saglasnosti na akt o imenovanju Miloša Jevtića i Vladanke Bojanić bila bi u potpunosti zanemarena odluka Skupštine opštine Šekovići, kao nadležnog organa koji imenuje članove opštinske izborne komisije, pogotovo iz razloga što imenovani ispunjavaju **sve opće i posebne uslove utvrđene Izbornim zakonom Bosne i Hercegovine i što su ispoštovane procedure propisane Uputstvom.**

Obzirom na navedeno, po ocjeni ovog vijeća, pobijana Odluka Centralne izborne komisije BiH je pravilna i zakonita, a žalba neosnovana, pa je istu, primjenom odredaba člana 81. stav 1. Zakona o upravnim sporovima Bosne i Hercegovine (Službeni glasnik BiH, broj 19/02, 88/07, 83/08 i 74/10), valjalo odbiti.

**PREDSJEDNIK VIJEĆA  
S U D I J A  
Vesna Trifunović**